



TERTIB ACARA MODEL F (HBN)
GKPS P.BULAN-RESORT POLONIA MEDAN
MINGGU 6 DOB TRINITATIS, 27 JULI 2025
TOPIK: “Tonggo Mangindo Haluahon”



1. Votum – Introitus – Tonggo

Pandita : Riap ma hita jongjong!
: **Ibagas goran ni Naibata Bapa, pakon Tuhan Yesus Kristus ampa Tonduy Na Pansing, Sitompa langit pakon tanoh on. Amen.**

Kuria : Amen

Pandita Ale Naibata, Ham do Naibatanku, na hupindahi. Horahan do tonduyhu Bamu, siholan do dagingku Bamu songon tanoh na dorging anjaha na horah, na so marbah (*Psalmen 63:2*). **Haleluya, Haleluya, Haleluya**

Kuria : Ha-le - lu –ya...Ha- le - lu –ya....Ha-le - lu-ya.....(mandodingkon)

Pandita : Martonggo ma hita!

Ham Tuhan Naibata Jahowa simada kuasa, na mangidah torus das hubagas hauhuron ampa sura-surunami. Seng dong na lingod humbani panonggor-Mu. Bani na roh hanami hu lobei- Mu ibagas parsombahonnami on, papansing Ham ma uhur pakon pingkirannami marhitei Tonduy-Mu, ase boi sintong pamujion pakon pangkaholonginami Bamu, janah tongtong ipasangap hanami goran-Mu na Pansing in, marhitei Yesus Kristus Tuhannami. Amen. (*hundul kuria*)

2. Mandoding Haleluya 306. Huamegahkon do in Tongtong (1+2);

1. Huamegahkon do in tongtong: Yesus Tuhanku rupeihu tongon; Au parsimada tinobus-Nin napinabayu ni Tonduy in Marmegah-megah mandoding au, mamuji Yesus parholong in Marmegah-megah mandoding au, mamuji Yesus parholong in.

2. Ondos ganupan na dear in, pasu-pasu-Ni na manggoki au Songon doding ni malekat in, holong mamitah rap pakon au Marmegah-megah mandoding au, mamuji Yesus parholong in Marmegah-megah mandoding au, mamuji Yesus parholong in.

3. Hasasapan ni Dousa

Pandita : Riap ma hita jongjong!
: Anggo ihatahon hita, seng dong dousanta, ipaoto-oto hita do dirinta, anjaha seng ibagas hita hasintongan in. Anggo isopotkon hita dousanta, hatengeran ni uhur anjaha bonar do la manasap dousanta ampa paborsih hita humbani haganup hagedukon (*1 Johannes 1:8-9*). Halani ai roh ma hita hu lobei ni Tuhanta mansopotkon janah mangindo hasasapan ni dousanta. (*Basaon ni Pandita ma baris parlobei ni salah sada doding na i toruh on*)

P + K : (*Mandodingkon: Haleluya No. 234:2*)
Holong atei-Mu, mangidah ganup parlahouhu,
Ai ma tongon, hotop do sai kahou langkahku.
Sai sasap Ham dousangkin, o Tuhan.

Pandita : Martonggo ma hita!

Ham Tuhan Naibata paridop ni uhur banggal. Iparhatongon hanami na hotop do hanami iparjabolon dousa, anjaha lang boi hanami maluah anggo mangajamhon gogohnami sandiri. Mardousa do hanami dompak Ham marhitei pingkiran, hata sonai age pambahenannami. Janah mardousa do homa hanami marhitei na lang ihorjahon hanami na patut sihorjahononnami. Lang ihaholongi hanami Ham humbani bulat ni uhur, gok ni tonduy, pakon bois ni gogohnami. Lang ihaholongi hanami hasomannami doskon dirinami sandiri. Maidop ma uhur-Mu bannami, sasap Ham ma dousanami, anjaha bobai Ham ma hanami ase margoluh na bayu, manggoluh ibagas harosuh-Mu janah mardalan bani dalan-Mu. Ibagas Yesus Kristus, jalo Ham ma tonggonami on. Amen.

Pandita : Maronjolan humbani kuasa ni Naibata, huhatahon ma bani nasiam:

(*langkah Pandita tangan siamunni anjaha ihatahon ma*)

Ibagas goran ni Naibata Bapa, pakon Tuhan Yesus Kristus ampa Tonduy Na Pansing, tenger ma uhnasiam, domma sasap haganup dousanasiam. Riap ma hita mangkatahon: Amen.

P + K : Amen (*hundul kuria*)

4. Mandoding Haleluya 214. Ale Jahowa Naibata (1+2); as = do

1. Ale Jahowa Naibata, sai tatap hanai on,
ai dousa nami nabahat,
iboan hanai on. Holong ma Ham bannami on,
sai sasap dousa nami on,
Marhitei Yesus Anak in, na matei bani silang In,
i Golgata i dolog golgata.

2. O Yesus, haholongan in, sai tatap hanai on,
Ai ham do hatundalan in, jagai Ham hanai on.
Sai ulang magou on ganup, tinobus-Mu do haganup.
Taluhon Ham sibolis in, ai nabajan do akal nin;
Pagoluh Ham, hanami on romban.

3. Ale Tonduy Napansing in, sai tatap hanai on,
Sai suan Ham holong-Mu in, bai uhur nami on;
Pasada uhur nami bei, ampakon tonduy nami pe,
Lao mangirikkon ojur-Mu, mangkasiholi sondang-Mu
Parholong in, pardear layak in.

5. Hata Haporsayaan

P : Riap ma hita jongjong!

Saksihon hita ma haporsayaonta in, songon na sinaksihonni haganup halak na porsaya i sab tanoh on.

P+K: Ahu porsaya bani Naibata Bapa, pargogoh na so tarimbang, na manompa langit pakon tanoh on.

Ahu porsaya bani Yesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy na Pansing, na manaron na parngit, bani panorangni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, parsauran ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen..(*hundul kuria*)

6. Tingting + Tonggo Pangapition

7. Mandoding 129. Ai Jumpah Au na Holong Atei (1+2) ; do = g

1. Ai jumpah au na holong atei, au na tarbuang in hinan.
Jesus Tuhan parholong atei hubangku na kahou hinan.
Nuan hutanda Tuhankin, parholong atei banggal in,
parholong atei banggal in.

2. Halani buei ni dousangku, sai hona uhum au tama;
Hape roh Jesus ipadomu au use pakon Naibata.
Madurus do daroh-Ni in, mambahen pardomuan in,
mambahen pardomuan in.

8. Ambilan: 1 MUSA 18: 22-33

9. Mandoding 100. Hujon ma Ho, ale Tonduy (1+2); do = f

1. Hujon ma ho, ale tonduyhu, na horahan loheian tong.
Manjalo layak ni Tuhanku, pinasirsir-Ni in tongtong.
Ibere Jesus do daging-Ni marhitei-hitei ruti on.
Ibere do pakon daroh-Ni marhitei-hitei anggur on

2. Age tongtong pe ari-ari daroh-Ni mangurasi au,
Anjaha seng marnamangadi, manogu hu lambung-Ni au;
Sihol au mangan parpadanan ni Jesus Kristus, Tuhankin.
Na padameihon partinggilan, na pasonangkon uhurhin

10. HORJA BANGGAL NA PANSING

Pdt : Riap ma hita jongjong!

Paridop ni uhur anjaha pardear layak do Jahowa, nanget manringis anjaha paridop ni uhur banggal. Seng ibahen hubanta romban hubani dousanta, anjaha seng ibalaskon banta romban hubani hajahatonta. Songon idop ni uhur ni bapa bani niombahni, sonai do idop ni uhur ni Jahowa bani sagala na mangkabiari-Si. (*Psalmen 103:8, 10, 13*).

Pdt : Martonggo ma hita! Ham Tuhan Naibata Bapanami paridop ni uhur na tarsulur ibagas Tuhan Jesus Kristus. Ham do sibere haluahon pakon hagoluhan na sadokah ni dokahni marhitei Anak-Mu Jesus Kristus Tuhannami, na sirsir manggalangkon diri-Ni mangkopkop hanami pardousa. Bani na ijalo hanami parpadanan na pansing on, maidop ma uhur-Mu bannami. Tonduy-Mu na pansing in ma mambuha uhur ampa na patotapkon haporsayaonnami, ase lambin martenger ni uhur hanami hubani Jesus Kristus na mangkopkop hanami. Amen.

Riap ma hita martonggo marhitei tonggo na niajarhon ni Tuhan Jesus hubanta!

P+K : Ham Bapanami na i nagori atas, sai napapansing ma Goran-Mu. Sai roh ma harajaon-Mu. Sai saud ma harosuh ni uhur-Mu i nagori tengah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou. Ai Ham do simada harajaon, pakon hagogohon ampa hasangapon sadokah ni dokahni. Amen.

11. Sungkun-Sungkun

Pdt : Hita ganup na hinarga ni Naibata, iparsinta hita sonari manjalo parpadanan na pansing in. Halani ai ningon tangkas do hu banta pasal Horja Banggal na Pansing in, ronsi aha do ulihta hunjin. Parpadanan na Pansing aima hataridahan ni idop ni uhur ni Naibata hubanta. Halani ai martarimakasih ma hita hubani Naibata, na dob paluahkon hita marhitei Anak-Ni, Jesus Kristus. Bani na sihol ijalo hita ruti pakon anggur na gabe parhiteian ni daging pakon daroh ni Kristus, roh ma hita hubani Tuhanta ibagas toruh ampa borsih ni uhur. Halani ai balosi ham ma sungkun-sungkun on:

Pdt. : Ihaporsayai ham do Tuhan Jesus Kristus na dob roh hu tanoh on paluahkon pardousa, la na dob matei ampa mulak manggoluh mangkopkop ham, mamorsan janah manasap dousamu? Ihaporsayaiham do?

Kuria : Huhaporsayai do.

Pdt. : Ihaporsayai ham do ruti pakon anggur na bani parpadanan na pansing in, in ma na gabe parhiteian ni daging pakon daroh ni Tuhan Jesus? Ihaporsayai ham do?

Kuria : Huhaporsayai do

Pdt. : Ra do ham mangkagoluhkon hasasapan ni dousa na dob ibere Tuhan Jesus hu bamu marhitei na mangkagoluhkon goluh na baru? Ra do ham mardear pakon halak na manunsahi uhurmu, janah manasap dousani? Ra do ham?

Kuria : Ra do ahu.

Pdt. : Ibagas malas ni uhur do Naibata manjalohon pangakuan sisonai ai. Tarpuji ma Naibata marhitei haganup pargoluhanta. Amen. (hundul kuria)

12. Mandoding 134. Ambit Lang Ham Rupeihu, ale Jesus(1+2)

1. Ambit lang Ham rupeihu ale Jesus,
jaha daroh-Mu manghakui ahu
mintor huja ma ahu na mardousa, marhaporusan.

2. Ai seng be dong na songon Ham Tuhanku,
Na parlunggarhon pusok ni uhurhu
Sahalak Ham do sipasonang ahu, hagoluhanku

13. Onjolan ni Parpadanan Na Pansing:

Pdt : Anggo sonai, paunduk hita ma uhurta, mardingat tonah pakon manangihon hata ni Tuhan Jesus bani na pasirsirhon parpadanan na pansing in.

Ibuat Tuhan Jesus ma ruti bani borngin sanggah na hona partahian la. Ihatahon ma tarima kasih, dob ai itopiki ma ai, ibere hubani susian-Ni irik ihatahon:

(*Pandita mangangkat tangan siamunni i atas ni ruti*)

“Jalo nasiam ma, anjaha pangan ma, daging-Ku do on, na binerehon mangkopkop nasiam. Bahen nasiam ma sonin gabe pardingatan Bangku”

Dob salpu sidea mangan, ibuat ma panginuman in, ihatahon ma tarima kasih anjaha ihatahon ma dompak sidea:

(*Pandita mangangkat tangan siamunni i atas ni anggur*)

“Jalo nasiam ma, ganup ma nasiam manginum hunjin, ia panginuman on, padan na baru do on, marhitei daroh-Ku, na niduruskon mangkopkop nasiam, bahen hasasapan ni dousa. Bahen nasiam ma sonin gabe pardingatan nasiam Bangku”

(Pandita mangankon ruti pakon manginum anggur parpadanan. Ase roh ma nasiam, ai domma sirsir haganup!

Dai anjaha tonggor nasiam ma dear layak ni Jahowa. Martuah ma sagala na martenger ni uhur hu-Bani.

14. Parpadanan Na Pansing ;

Singer Mandodingkon Hal.390 (sanggah majelis mambagi roti pakon anggur)

1. Horja banggal napansing, tadah ni tonduyin.

Ulang adong na tading, roh ma bai Tuhan in.

Ai daging ni Tuhan Jesus, ruti na pansing in.

Ampa daroh na madurus, inumon na pansing

2. Dunia na gok dousa, gok paruntolon do

horahan, lohei, porang manosak do tongtong

Ai daging ni Tuhan Jesus, ruti na pansing in

Ampa daroh na madurus, inumon na pansing

3. Roh au nuan marsombah bai parsilang-Mu in

Mangindo hasasapan, ‘se sahei dousangkin

Ai daging ni Tuhan Jesus, ruti na pansing in

Ampa daroh na madurus, inumon na pansing

15. Doding Haleluya 323. Domma Roh Au o Tuhanku (1)

1. Domma roh au o Tuhanku bani hayu silang-Mu

Hugalangkon ma diringku bani halojaon-Mu

Hatuahon in, malas uhurhin

Ai bulat do hugalangkon ganup diringkon

16. Puji-Pujian Pakon Hatarimakasihon: (Psalmen 34:2-5, Jongjong Kuria)

P : Sai pujionku do Jahowa bani sagala panorang,

K : Tongtong do puji-pujian-Ni ibagas pamanganku.

P : Marhitei Jahowa do marmegah-megah tonduyhu,

K : Ibogei halak ma madoyuk ma ai, gabe malas ma uhurni.

P : Hasomani nasiam ma ahu pabanggalhon Jahowa,

K : Sai rap ma hita patimbulhon goran-Ni in.

P : Hupindahi do Jahowa, anjaha ibalosi do ahu;

K : Ipaluah do ahu humbani sagala habiaranku.

P+K : Puji hita ma Jahowa, martarimakasih ma hita hu Bani. Amen. (hundul kuria)

17. Manggalang Sekaligus Padaskon Amplop HBN

P : Paima iondoskon hita galanganta, tangar hita ma lobei hata ni Naibata na gabe onjolan banta laho manggalang aima na tarsurat bani 1 Kronika 16:29: “Bere ma bani Jahowa hamuliaon ni goran-Ni, boan ma galangan, anjaha roh ma nasiam hu lobei-Ni! Sombah ma Jahowa marpakeian na mapansing!”. Sonari ondoskon hita ma galanganta! (diiringi musik/doding)

439. O Tuhan, Tolong Ham Ma Au On

1. O Tuhan tolong Ham ma au on tongtong,
na ibagas paruntolon on
Pitah holong-Mu tumang,
boi pasonang uhur tongtong

Sai tatap Ham ma Tuhan au na sombuh on,
hata-Mu in do Tuhan haluahon
Anggo hudingat ganupan layak-Mu in,
o Tuhan malas ma uhurhin.

2. Anggo roh hamaholon mandorap au
Goran-Mu do hudilo tongtong
In hupindo hu Bamu.
Ase ondos Bamu ma au on.

Sai tatap Ham ma Tuhan au na sombuh on,
hata-Mu in do Tuhan haluahon
Anggo hudingat ganupan layak-Mu in,
o Tuhan malas ma uhurhin

18. Tonggo Galangan- Panutup-Pasu-pasu

P : Riap ma hita jongjong.

Ham Tuhan Naibata Bapanami parholong ni atei ampa paridop ni uhur. Ipuji janah ipasangap hanami do Ham halani idop ni uhur ampa dear ni layak-Mu na dob ijalo hanami. Domma ihopkop Ham hanami janah isasap Ham dousanami gabe manggoluh hanami ibagas idop ni uhur-Mu in. Pabayu Ham ma hanami mandalani ari-ari ni goluhnami ase margogoh janah marhamonangan hanami mangkorjahon harosuh ni uhur-Mu. Patotap Ham ma haporsayaon ampa pangarapannami hu Bamu, ase margogoh hanami pasangapkon Ham sadokah goluhnami. Tarima kasih ma Bamu Tuhan bani haluahon ampa pasu-pasu-Mu na dob ondos hu bannami. Ijon igalangkon hanami do dirinami pakon buah ni horjanami, gabe tanda ni tarimakasihnamami hu Bamu. Pasu- pasu Ham ma galangannami on laho padoraskon pardalan ni horja i kuria-Mu. Lambin pasu-pasu Ham ma goluh ampa horjanami pakon sinadongannami, ibagas Kristus Jesus Sipaluah hanami. Amen

K : (Mandodingkon Haleluya No. 281:5)

5. Bamu, o Tuhan manombah au on
Bamu ganupan na dong bangku on
Seng bulih be sirang na rapat Bamu
Martuah sai sonang na roh hu Bamu

P : Laho ma hanima hu sab dunia on, ambilankon hanima ma Ambilan Namadear in bani sagala na tinompa!

Jalo ham (hita) ma pasu-pasu humbani Tuhan Naibata: Ipasu-pasu anjaha iparorot Tuhan Naibata ma ham (hita), Isondangkon Tuhan Naibata ma bohi-Ni hu bamu (hubanta) janah maidop ma uhur-Ni mangidah ham (hita). Idompakkon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduyamu (tonduyta bei). Amen.

K : Mandodingkon : Amen, Amen, Amen